

四庫全書

集部

欽定四庫全書

集部
至正集卷

五十七至
六十

詳校官編修_臣錢樾

侍讀_臣孫球覆勘

總校官降調編修_臣倉聖脉

校對官中書_臣潘曾起

謄錄監生_臣左德藩

欽定四庫全書

至正集卷五十七

元 許有壬 撰

碑志

吟竹先生墓表

天臨儒學正顏士穎奉大父吟竹翁行實請曰大父葬
三十二年多難奔走表於墓而未能亦惟僻左未獲攸
記託其在今日乎余燭其誠序之曰翁諱奎字子俞吉

州永新人唐魯公十九世孫父某迪功郎監南嶽廟母
某氏迪功沒益勵於學咸淳丙寅以書魁湖南漕而不
仕進文山文公嘗延致幕下德祐間文山起兵汀贛以
書來招為之感泣而竟不起築室以居寓書文山扁曰
觀遠至元丁丑故邑殘毀挈家避地百丈山鄉鄰多
從之庚辰參政劉奉命來宥過刑故眾懼俱焚公奮袂
曰人既予依則其命在予辭難其可偕進士胡幼黃深
衣謁轅門抗論不撓劉為改容豪右誑誤且死雖素有

隙者皆陰活之南北既一徜徉里閭復泮宮倡學者與
湏溪劉辰翁中齋鄧光薦輩游居雲外別墅自號雲外
山人門有萬竹日嘯詠其間學者稱吟竹先生至大戊
申夏五月廿二日疾革誡子孫曰吾年七十有四過人
多矣安能仰藥求活吾所謂不可以訓汝曹當孝悌謹
飭私勿傷義貧勿廢學喪勿事佛謹識吾言吾死無憾
矣言訖而逝明年己酉十一月朔葬琴亭雙塘原配譚
氏先八年卒三子長居安士穎父也以經行為人師次

資深逢原皆業儒二女孫男八人士穎其長平生尚氣
節家無餘蓄而性好客物雖素好人欲之即與不吝歌
詩跌宕可傳酒酣浩歌舞劍以泄其磊砢之氣豈齷齪
場屋之士所可比哉宋以文陶冶一世其亡也文士不
負國家炳炳若文山輩可數也然文山有位者也若子
俞者無位而有志者也方患難中奮出活人豈忘情於
世者乎其不應文山之招知時之不可為也然其磊砢
之氣又有不能自揜者焉亦叔世之奇士也銘曰

崑崙魯公萬古此忠慶源其深邈乎雲仍由枿于楨靡
任不勝天胡棄材山巔水隈余其歸哉四海一天乃誦
乃絃以逸耆年有清維河有卷匪阿傷之如何雙塘之
林鬱鬱其陰悠悠我心

贈通議大夫大都路都總管上輕車都尉清河郡
侯諡莊惠張公神道碑銘

贈通議大夫大都路都總管上輕車都尉清河郡侯諡
莊惠張公幼與先公同師王汝舟先生先生歸黃州先

公最長為諸生服故嗣教其徒公與焉公兄諱世豪娶有士姑先公獨一姊往來尤數公地則班也一為師生敬事不少怠赴德安軍民屯田總管謁先公於鄂先公棄代躬致弔賻鄉親師友義死生不替卒十年子宏請諡得今贈請銘諸碑公諱世傑字漢卿先世上谷人高祖誠徙彰德湯陰曾祖諱實千夫長歿於陣祖諱信有文行贈亞中大夫彰德路總管輕車都尉追封清河郡侯考諱崇好施予贈嘉議大夫大名路總管上輕車都

尉追封清河郡侯祖妣李氏妣尚氏皆從封郡夫人初
製國字學者通其字率難其言公入胄監習其書又精
其言甫冠從戍北庭辟帥府蒙古吏轉河南行省及格
授同知潁州事官承事郎未終更辟中書史擢朝列大
夫稱海宣慰使司都元帥府經歷陞中順大夫淮東道
宣慰副使泰定甲子以嘉議大夫遷德安天厯戊辰進
通議大夫同知察罕諾爾等處宣慰使司事副都元帥
佩金符至順癸酉三月日卒官壽六十九葬湯陰西百

里配楊氏封清河郡夫人宏廕忠翊校尉南陽府同知
嵩州事今河間縣尹次曰本日敬曰紀女二皆適士族
在北庭適都達寇邊從戰有功賴地善潞治溝洫歲以
稔修宣聖廟作兩廡青海戎務方殷應接無滯戍卒多
鄉隣貧不能歸者贍遺之淮東經賦營繕甲東南視成
有法韓姓者毒殺其姪吏受賕誣其繼祖母趙氏汴省
命讞之趙氏得白屯田課樹藝時稅歛歸豪右隱田三
百餘頃增糧二千餘石西邊歲饑鴻和爾部落從水牧

它徙邊民為掙請賑得楮幣七十五萬緡始遂生集構
三皇廟免公廨就祭之褻此其為政之大槩而仁民愛
物之實也論治國者必先於齊家而仁民必始於親親
公事親孝待兄弟友愛宗族貧弗給者周之失嫁娶者
為嫁娶之此親親之實也親親而仁民仁民而愛物有
本者如是夫嗚呼稱人之善必本其父兄師友名言也
公魯大父以忠著大父以學著考以義著季父懋德尹
二邑有惠政而世母趙氏又以孝節旌其門一門之教

有素故其造就若是之懿也銘曰

皇元肇文金篆玉書誕敷煥章漸被海隅易得者字難
肖者言心樂不融但窺其藩學惟基儒空是佔畢因其
警悟濟以定力胄徒雜還乃獨邁倫其聲於辭宛然國
人游更司譯始官倅郡力殫溝洫以教為政朔漠開闢
距天萬里行間幕中戰勇佐理副節淮海于旬于宣爾
賦惟期爾民弗寃屯田有方曰耕與守峙我廩庾壯我
甲冑招亡飫枵無忝使節且使其民順帝之則篤念吾

翁歲晚弗弛生省卒賻跋涉勞止屯膏未施偉績弗究
孰顯其先而開厥後蕩水流潤松柏彌阡弗爾子姓方
至若川

故朝列大夫饒州路治中王公碑銘

秘書典簿王忬奉亞中大夫僉浙東海右道肅政廉訪
司事杜東爨狀請銘顯考饒州路治中公碑有壬幼僑
江南聞鄉耆名願承教不得而其仕江南蜚聲騰實若
饒州公者乃熟耳考信者也返鄉里興汴游春盎王溫

學專行修益信其家訓有素考信不戾焉乃序而銘之
公起家江淮宣閩掾除江浙行省理問知事陞台州路
經歷辟掾江浙行省擢永嘉縣尹入為工部主事宣徽
院都事出知崑山州遷饒州路治中卒職七轉官累進
至朝列大夫其在永嘉地濱海饒鹹鹺豪戶若民通島
夷貿鬻官弗能制軋於運司總府前令職是失職者相
望公戒嚴條禁察尤者寘之法姦偽以息或誣張明一
為盜逮三十餘人獄具察其寃釋之同官固爭公曰理

寬令職也苟失出令自坐未幾得真盜其人相率繪公
象祠之作邑七年如初至臺剡上賜官一級白金五十
兩由是入朝著尚書省方變法冬官事尤禁糴酬決惟
允有爵秩金幣之賚皆不受宣徽上玉食恃不考計並
緣為欺公臺駘不貸衆忌之奏朔漠稽部落戶數以重
遠中傷之即日就道廷議優擢以老疾請郡遂有崑山
之命時覈田江淮使者暴急有司承風旨抑民虛承江
淮騷然公沿檄分覈慨然曰民瘼極矣吾豈能愛一身

而置民死耶上不便數十事識者韙之損虛糧萬餘石
州治更徙廟學未作乃倡衆曰京師至下邑莫不有廟
以祀有學以教况賓興有詔而吾州藐藐何以克副上
意乃作殿廡門墉齋舍廩庖靡不完美以舊學為玉
峰書院又建三皇廟社稷壇除蕩田重科摧抑兼并小
民以寧上考書最饒大郡也席未暖而沒惜哉平生砥
行立名風儀峻整事繼母卅年奉寡嫂至沒不衰廉而
好施祿入無餘彰德鄉里廟學祭器簡闕買銅備鑄數

千里致之其設施章章若是而壽止六十有二其乞補
外時年五十餘非老病也朝官速化補外鬱滯常情怵
所利忍恥力求老死旅食而不悔者接迹也有畀之而
不受強之而力却者乎若公者其有所見乎豈內職雖
利資級浮沉底僚懲其已施知其設施之難而一郡之
專有以行吾志而及吾民乎吾志苟行資級利不利不
校也嗚呼若公者可不謂賢矣乎公諱安貞字吉卿安
陽人卒以延祐七年某月某日葬以至治元年三月十

二日里曰司空從先塋也大父以上金亂譜亡考諱某
贈奉議大夫驍騎尉追封湯陰縣子妣程氏李氏配張
氏繼閔氏並封湯陰縣君閔恭儉靖嘉訓子有法後公
十年卒二子忤以才諍聞駸駸其進矣愷其次也女二
銘曰

予嗟王公半刺考終孰導其始孰勸厥止素履不愧濯
濯進退匪難匪急惟行是即有齟病源有汗萃冤嚴明
政舉爾釋爾愈郡疑底信軋者以振拔之內列震來不

龍言窮漠有稽我馬駢駢閔勞奚腆職也宜勉損下益上
為損之象實由肆毒我躬遑恤欲薰善良乃廟乃庠生
罔易守有沒無朽移忠由孝盍食其報清修不忒有子
實則西山巖巖洎水其南祔藏無忝五福斯斂流澤溉
浸三槐有陰我銘弗諸百世是法

故通議大夫江西等處權茶都轉運使萬公神道
碑銘

公蒙古準台民人小字萬嘉律長因為名國俗也既華

學友字以國卿其家廣平蓋魯大父天造初隸右部分
戍地也大父呼遜從討李璿攻襄樊鄂渚皆有功贈中
順大夫同僉樞密院事上騎都尉范陽郡伯配欽察氏
葉氏皆追封范陽郡君父孟格圖右衛親軍百戶達嚕
嚕齊佩銀符陞福州新軍千戶達嚕嚕齊佩金符贈亞
中大夫僉太常禮儀院事輕車都尉范陽郡侯配欽察
氏追封范陽郡夫人德善履歷具神道碑公守河間有
壬待罪政府江西茶政不修擇習而健廉而通者為都

轉運使以拯之公嘗貳其司有聲乃薦之廷議翕然既
奏可傳符至郡俄以疾卒至正二年四月二日也五月
二日葬曲周縣先塋壽六十有五明年九月孤壽安走
安陽謁銘哭不能禁拜已出行實復咽不能語有壬交
公厚望其孤已泣又洞其慙誠益為之動遂相與大哭
久乃始克讀其狀其善狀不能悉也公居嫡長世祿當
襲以讓弟諾海服勞宿衛除山北道肅政廉訪司照磨
兼管勾承發架閣庫以太常憂歸服除調山東道賑饑

有功南臺辟為行人俄除利用監知事又改南臺管勾承發照磨兼獄丞拜西臺監察御史論列剴切僉雲南諸路肅政廉訪司事麗江宣撫達嚕噶齊揚珠布哈橫甚逐同官激叛部內朝廷知之始懼而亡匿公以計誘出罷之復其同官叛者以息行部建廟學凡二十四所修廢驛二十二歸省太夫人京口及侍其疾扶柩至廣平復如京師遷祖考妣合葬先塋改僉江西道又改燕南皆以憂不起服除改河南道天曆之警行省臣與廉訪

司協議公謂潼關守不可緩承制除河南行省郎中出
守潼關文皇道汴錄其勞除河南道副使潼關失守夜
馳至行省發蒙古軍四十餘人又借民丁出帑資假富
室以足軍興鼓行而西遂復奪之會朝廷遣使退其師
還卒掠民子女皆奪歸其親賜彩段上尊初額森努爾將
兵禦西師屯彰德約備芻粟已竭宿留不進士卒將大
肆掠公開諭以理遂移衛輝境蓋始約有備之地一郡
幾亂賴公以免擢同僉中政院事理財江浙仍有金帛

之賚改儲政院判官拜監察御史按覆諸道風米肅然
為戶部郎中楮幣壅滯督焚以通之倉儲積弊立法以
覈之閩中去京遠選人間闕故事三年遣使即江浙省
銓授公以選行就除行省左右司郎中茶司復立授同
知江西等處權茶都轉運使司事分治湖廣江西江浙
課以登商旅以通官庶以不擾入為戶部侍郎復通州
倉糧三十萬石行蜀拯鹽法之弊人謂得宜陞內宰甫
月改河間路總管兼諸軍鄂囉總管管內勸農事首建

學宮若干楹百廢修舉胥畏民悅推茶劇任知公者咸
謂必稱而條焉長徃惜哉積階自將仕佐郎至通議大
夫配沙卜珠氏封范陽郡夫人又娶趙氏在南臺每憂無
子有壬解之曰以子之心不患無子後果生子壽安也
愿而有立室而有出公可無憾矣女四人適國子生旺
扎勒布喀江浙行省理問瑪古岱爾宿州同知王敏行一
未行弟二人諾海自襲官有聞四轉至鎮江上萬戶府
達魯噶齊階太中大夫曰達春宋氏出也公幼有志節

襟度宏朗滑稽微中機鋒叵測分部上京它曹官莫不
舍其署雜還相從其為人悅慕若此而疾惡若仇辭色
不能隱亦用是來議者之口焉左警巡院判官王克觀
洎其家五人相繼死為具載歸葬之道高郵十路都萬
戶府知事龍寶臣出使卒殞水濱捐金顧江道士遷其
柩歸葬曲周顯官有放其子者孫且十歲一日過之因
言父子天倫甚至乃蹙然問曰君子有幾歲公曰尚少
當令來拜明日挈其孫往其人撫愛不釋公曰此兒與

君有骨肉親錯愕久之乃語之曰此君之子某之子也
遂大慟奉楮幣銀酒具為謝受之還遺其子卒為父子
子今亦顯微公則天倫或幾乎絕矣其篤行行義若此
與大權貴舊而狎不敢遠亦不近之免趨附之迹其讀
書好文蓋太常教之有素而復天姿穎悟喜交儒士灼
然有見於道義故確然無間於吾徒也山北南臺暇必
相從有酒必共先太夫人棄代維揚自京口來賻南歸
過之戀戀不忍別騎送至金陵東郭始泣而歸中途宿

旅邸疲甚而寐必踞撼使寤笑談達曙目不少瞑翼日
神觀不少昏疲京師僕僕多事亦撥冗過從又同扈上
京交游厚且久它人不及也銘復何辭銘曰

有紫其服有金其符賞延在身乃及友于視其不取見
其有餘紆青幾時冠鐵衣朱逢涌孰禦載馳驅投紱
滇池萬里接浙嘗樂視舉獲殫子職衰經洊命禮經是
式分節河南邊聲孔劇力障其衝旋復其失兩為地官
不競不求廩枵而克泉擁而流惟瀛大郡實為甸侯先

教後刑學宮以修昔貳茗政衆與能事俾長權司以修
厥廢軺方脂牽奄忽云逝聞者盡傷矧予夙契子銘不
愧子善實多剛而不虛從而阿不膠於習不流於和
有美承家其魁已莪曲周之澤發於盈科刻文樂石百
祀不磨

至正集卷五十七

欽定四庫全書

至正集卷五十八

元 許有壬 撰

碑志

故西華縣尹楊君墓志銘

君諱伯循字循禮姓楊氏世居湯陰鶴山曾祖諱寶祖
諱林始遷安陽壽八十七妣韓氏壽八十五考諱青字
才卿善廢舉用是豐裕壽九十二旌高年耆德妣梁氏

壽八十九長子永福能世其業次君也起家冬官行人
除曹州成武縣主簿官進義校尉有惠政邑人紀之碑
終更人不能忘又為去思碑改濟寧路金鄉縣主簿進
寶義校尉益自砥礪風紀交薦其能民又紀之碑陞忠
顯校尉京畿萬斯南倉監支納親老不赴二親沒服闋
擢陳州西華縣尹需次田里至正三年七月廿二日以
瘍卒年五十有三是年八月廿八日祔相縣固先塋配
和氏子二人長曰振次曰郁女一人未行孫堅孫甫四

歲余始識循禮京師熟其誠慤故瑣屑皆諉之來鄉里才卿已九十餘時獨騎相過健捷如少年予今之來才卿已逝可念而循禮適赴調歸話存沒相慰勞俄別去行田遂不起振以總管杜公叔愚狀偕來請志嗚呼循禮家饒羨有子且有孫沒可無憾余獨悲其祖考妣考妣皆以壽稱循禮又鄉里稱善人者宜享上壽而僅若是惜哉又悲其兩在貳佐見之設施能使邑民悅服薦剡迭上使地居得為吾知其效視已試必倍得其地矣

而卒不得施西華之民視成武金鄉之民何其不幸哉
始循禮崎嶇棄養千升斗之祿以顯親也七品法當推
恩其親格已及矣而親與身皆不待西華之民不幸孰
與循禮之不幸耶是雖人力之所不及而又不能不為
之悲焉銘曰

貳邑不卑厥聲四馳長人可為乃不獲施兩世四人兒
齒黃髮心有弗究孰為是愬西南之原萬枳維藩祖考
是從體魂孔安念子父子過從歲久子壙我銘是亦子

壽

故濟寧路醫學教授李君墓碣銘

醫之為術重矣哉民蹈於辟懲復生復屬之不可覆讞
究極得其情且不忍世乃有以齊民操是權者寒溫虛
實毫釐千里為之術者可不謂重矣乎周疾醫治疾養
以五味穀藥眠以五氣聲色兩以九竅參以九藏法若
是其備也書其所以稽事制食責若是其至也生民之
遂其壽宜哉我元擴好生之德建學立師徧乎天下視

周制有加焉至元後庚辰有壬赴召道參戶病暈嗟使
以教授李君之會薦所苦尋愈癸未再見始悉其蘊久
乃出其父教授君行實請銘而又悉其家學之有自也
君清州會川人大父諱仁父諱琮三子曰祐曰忠曰克
讓字仲謙君也穎悟嗜學九歲喪父人異其哀事母以
孝聞外舅張儀之世業醫有聲燕趙間從學有得醫院
檄為滄州學正陞河間路教授講席凝塵慨然曰我職
雖輕責不輕也奮然以師道自任郡守洞其學始尊禮

之由是學者皆至迄有著效天竺僧貴至司徒欲與俱
北以老母辭職教八年移真定母憂以能喪聞服除調
衛輝又轉濟寧致仕歸居參戶密邇鄉里生齒繁有以
行其施扁齋曰庸因自號云至正二年三月十九日卒
於家壽八十有三四月三日葬會川孝感原配張氏前
十年卒祔焉子三人曰瑞曰端皆早世曰亨之會也仍
河間教授孫男二秉直業儒篋早世女一尚幼君為人
和易頎而潔皙冠服甚都人望而敬口無調謔手絕奕

弄請求塞門貧富不二其徒多著有為國醫者士議君
為醫根儒故其造詣非淺淺者所能企及五十年人活
叵計使書其所以稽事制食庶幾無愧者乎陰德以活
人為大孫思邈極言陰陽報施豈誣也哉君活人多未
食其報育有子業儒其在是也夫銘曰

軒岐與義傳昧謾聞不根于心猶稼弗芸弗芸而歲其
喪有幾傳昧之患仆則莫起大聖垂訓灼如日星學焉
不精盲索冥行天闢壽域官師建設其名其章遂與儒

埒紆青滔滔一命是榮孰究其職孰半其能宋清藥市
清風柳筆以而之能辭其可釋徵而在人顯而在天有
報不忒時或後先八十三年天不爾嗇孝感之原尚沛
其澤

贈朝列大夫祕書少監騎都尉安陽郡伯莊公墓
誌銘

同知順德路總管府事莊溥授其弟封同知林州事誠
行狀論於郡人許有壬曰先子見棄且三十年葬若祭

雖若可以為說者而納壙無銘有善弗章今不幸母復見棄啟祔有日吾母之善不可無志也吾母不可以無志吾父可以無志乎因吾母之祔啟吾父之壙而納之銘銘復有託豈遲速有待而天假以今乎溥衰經不敢違次以請幸哀而賜之銘有士不及識溥父交溥久知其人在里聞知其家銘亦宜哉莊氏之先潞州上黨人至俊徙彰德安陽俊生榮榮生信字信甫是為溥之父以溥貴贈承直郎禮部員外郎進奉議大夫太常禮儀

院判官驍騎尉安陽縣子朝列大夫祕書少監騎都尉
安陽郡伯貌偉而度宏喜施而不責報兄弟四人友敬
著一鄉妣張氏教毓有法故不墮凡近使鄉里稱長者
殫力治生家日充裕延師教子姪百口無間言再從子
清洎弟妹四人無所依撫育勤至為之嫁娶焉故舊喪
有貧不克舉者為擇便地具棺衾延祐三年六月二十
八日卒於家年六十有一七月三日葬安陽河次村先
塋配王氏同郡處士子文女封恭人進封安陽縣太君

安陽郡太君幼淑慧能誦書詩婦工臻極年十八歸莊
氏事姑五十年不怠與諸娣居六十年睦如兄弟一門
事仰成不以為勞臧獲有疾必躬視之至正四年閏二
月廿一日棄代于溥官所壽八十有九是年五月二日
祔少監墓二子溥其長幼多病鞠養尤苦甫冠俾入胄
監肄業由伴讀貢士部轉集賢掾除承直郎懷慶路推
官轉奉議大夫太史院都事陞朝列大夫為今官次本
純篤克家一女將嫁而卒孫男二曰文暉幼未名孫女

一姪男十四人姪孫文昭登至順癸酉進士第起家承
事郎同知潞州事辟掾西臺轉中書右曹掾除工部主
事文雅廣平儒學錄初溥南北蹭蹬欲養莫遂及調順
德密邇鄉里奉板輿以行太君亦欣然就養而年在喜
懼故惴惴欲辭歸決閏月二十日行而十六日遘疾遂
不起為終天之恨然父母教子見其有成而享其祿養
無睽離之憂壽而考終於子婦之手人子之心其亦可
以無悔乎然而人子欲親之壽寧有既耶壽不可力致

也銘其善不使湮沒是獨不可力致乎銘曰

於戲祕書沒三十年發身施仁鬱而弗宣其鬱其宣蓋
亦有時時罔克力曷云已而幽墟一闕沒齒泣血偕
未亡人茲焉同穴茫茫昊天踴踴孝子附傳有聞親則
不死世有兄弟乃闕于牆亦有婦姑勃鏤若常一國幾
人所慕巨室夷考或虧齊民何式父為賢父母稱賢母
何以知之有子如溥嗟爾來嗣聿慎厥修以迓以續相
彼洹流

故漕運同知紐赫公妻伊德氏墓誌銘

夫人名瑞童系出伊德氏高祖察罕太師河南武宣王
開國有功父賓咱雅遼陽行省右丞妣巴雅爾內範恭
肅夫家奕世富貴而削華服儉夫人質稟懿淑濟以慈
訓故成習異於人惟紐赫氏為金世臣曰鈞我元中書
左丞相子南合中書平章政事樂相風土家焉相人稱
中書家平章孫世臣中憲大夫同知京畿都漕運使司
事中憲以貴盛難昏夫人家亦偃蹇擇壻地均德齊二

姓之好克諧中憲祖妣妣皆伊德氏至夫人則連姻三世矣延祐乙卯九月來歸一門千口里南北連阡陌中憲縻於官漫不暇省需縻不貲夫人苴補移掇不使見罅缺宿臧老獲皆惛伏中憲不韋四十一而卒夫人屏斥華澤勵節治家坐亦有常處田園經葺有加焉初封恭人再封威寧郡君至正四年甲申四月二十一日以疾卒年四十有六六月三日庚申祔湯陰小韓村中憲之墓一子祿通教不少貸每戒之曰汝父幼冲失父母

孑然有立敬歷駸駸天遽奪去先烈烜赫繼承不墜責
其在汝矣祿通服膺惟恪懲父養不待冀得盡於母夫
人之卒祿通適在京奔歸日已兩浹矣祿通以其友陸
愷所述行實請銘予惟女德之懿世宜有聞徵諸鄉里
昔南北分裂相直兵衝聚異合汙俗靡以偷而世變無
常風移俗易唐宋而下女節義班班可考也朱子采顏
氏一時之言而不知遺風之已殄也觀夫人之善則知
吾鄉風俗之美漸摩之久有自來矣予與中憲交知夫

人之賢且欲有以聲吾鄉之非昔也為之銘曰

奢麗敝化貴驕速亡夫也不免女也曷望脫襁怙侈世家習祿不慎厥居孰建其覆戚疏萬趾言不易刑制以閒雅截截戶庭我生不辰為未亡人一日未亡一門在身有子子遺常情溺私易愛以嚴是為大慈良人永逝教子有立而壽不昌而事斯畢

元故集賢侍講學士中奉大夫徐公墓誌銘

愚交鄉人得善人徐公焉公由汴反鄉里病革但一再

見至正四年六月十五日薨夫人介其親請誌其墓公諱奭字周臣其先武陟人曾祖考諱義金季遷安陽祖考諱珪累贈嘉議大夫兵部尚書上輕車都尉東海郡侯考諱秉元朝列大夫同知建昌路總管府事致仕累贈中奉大夫江浙等處行中書省叅知政事護軍東海郡公祖妣王氏蔣氏妣續氏皆追封東海郡夫人公由國子生為學錄除廣平路照磨掾禮部除拱衛司知事掾中臺中書右司除延福監經歷改太常禮儀院都事

陞經歷戶部主事陞員外郎拜監察御史劾臺臣不稱
者由中書省右司都事出僉浙西道肅政廉訪司事入
為中臺都事中書省右司郎中擢浙東道肅政廉訪使
以靜治聞贊僧作橋以利病涉徵為戶部尚書遂參議
中書省事除禮部尚書改點南廉訪使奏仍禮部拜治
書侍御史與言事者不合遂歸俄復除禮部尚書擢河
東山西道宣慰使拜河南江北等處行中書省參知政
事改集賢侍講學士病不可支矣三子定僧佛留胡養

皆天養姪子亦死病蓋坐是也得年六十五為人恂恂
至官事有蘊即發為參議有發倉儲為功者嘗折其人
主者怒因斥為禮部其復留也實陰中之謂其虧在公
為戶部界域奏令督徵而歲月可考勢不容辨日事榜
笞迄詔放始已歷官多績惜狀不見有待他日焉昔人
為鄉里掾史稱善人斯可矣及人則未也使鄉里稱善
人而致位赫奕又有及人之功焉少游斯下矣天道無
親常與善人公善人也而卒無子傷哉兄戲章佩監知

事卒弟良僉江西道肅政廉訪司事恪屯田長官陞高郵鹽倉副使娶杜氏繼王氏今夫人劉氏追封若封皆東海郡夫人月日祔安陽郭里先塋銘曰

天可必邪鴻濛沆茫孰往致結不可必邪善淫福禍可待於立善或禍而淫或福又謂其未定之日及其定也善已禍矣定復何益伯道殺子天道亦宜公而無子有知無知豈所謂定者昌其名於不死失於彼而得於此凡重嗣續在先世祀叔也有子先世之祀無止公亦可

以無憾矣

至正集卷五十八

欽定四庫全書

至正集卷五十九

元 許有壬 撰

碑志

故承事郎河東山西道提刑按察司經歷李公墓
碑

愚昔玷政府里人李君惟閏實掾西曹愚投劾歸惟閏
亦至自西臺以愚稔其世而喜銘善也屬銘大父經歷

公之善乃叙而銘之公諱衍字衍父姓李氏上世居臨邑曾祖諱邑三子一徙青一徙徐一為公祖諱信長鬣美風儀養恬鄉里配孟氏周氏考諱成金季山東盜起避地襄城徙潁之虹橋天兵戡定遂率衆降北渡至彰德家焉善廢居致饒益自以生罹兵難靡遑問學誓有子必業儒故伯子壑六歲遣就傳侈費不靳配張氏四子公其仲也幼警悟游更名師肄習精進國初慮四民貴賤無別而郡邑誅求或苛於士也立格試藝中者復

之公年十三從兄試經童遂占儒籍尋以冒復者衆覆
試真定公兄弟復入高等左丞張公仲謙宣撫大名辟
致幕下簡牘往往出其意表轉山東按察書吏憲使陳
公慶夫數薦之講經議政與之竟日七年三易使禮遇
如一除將仕郎燕南按察知事入掾御史臺陞承事郎
河東經歷未行至元十八年四月日卒于京師年四十
有七祔安陽輔嚴鎮西城原先塋兄壑仕覃懷為許文
正公所與終承務郎陝西行省都事弟曰衛曰衍配陳

氏趙氏子男二曰舉以子惟閏貴贈奉議大夫太常禮
儀院判官驍騎尉安陽縣子曰實皆陳氏出女一適恩
州儒學教授王三省趙氏出也孫男三曰知善克世其
業次則惟閏也起家職校歷掾部院中書除通政院都
事改中書省架閣管勾拜西臺監察御史陞都事擢僉
都水庸田司事官朝散大夫曰諒女五長適劉思義餘
皆士族曾孫男二曰某曰林女四長適路無頗餘未行
公性孝在官聞親疾即棄歸名公卿未嘗吏之疑以決

乖以和涵剛翼柔故能獲乎上而不忌乎下也綴述以
發其蘊詩尤膾炙人口愚觀吾鄉故家隆替李氏足徵
焉良才世不乏顧父兄之教何如公之父逃生鋒鏑力
教子儒卒致顯融雖天柅其遠未盡厥施然淵蓄之發
後先有時惟閏歷言官贊大臬僉水部積階四品實益
騰秩益峻昔之人淑其子又及其曾也廢居以裕一時
儒業以亢後世其效不既章章乎恃其厚貲納子于邪
不易世而丐于市者可不知所擇哉銘曰

時乃否泰地有險夷伊志之持孰地孰時弛擔披荆息
肩無幾滄海橫流曷云能止嘽嘽鴻鴈既奠攸居乃厚
我生乃鳩我書我書靡及有子即我獲報之捷猶券執
左三冬用足于于棘闡伯也頡頏英聲駢蜚韞匱莫藏
禮羅尋致友皆忘年官無挾貴牙緋甫及窀穸遽從惟
取之約乃遺之豐有美孝孫籍甚其譽金紫取榮淵冰
方懼積善者人福善者天其獲惟後其難則先刻名樂
石匪誡而教嗟爾雲仍是則是效

故嘉議大夫東昌路總管兼本路諸軍鄂囉總管
內勸農事邢公墓誌銘

公諱溫字孟直姓邢氏彰德安陽人世居交口里山有
鹿崖因自號焉曾祖諱植贈亞中大夫彰德路總管輕
車都尉追封河間郡侯配李氏河間郡夫人祖諱德裕
承事郎藁城縣尹贈嘉議大夫工部尚書上輕車都尉
河間郡侯配王氏河間郡夫人繼郭氏封河間郡太夫
人考諱秉仁歷顯仕疏封二代致仕禮部尚書追封河

間郡侯謚安惠配蕭繼柴俱封河間郡夫人公性剛介
不屑州里入京師從中書斷事府長以其法得專辟者
假途焉出官從仕郎仍本府知事辟左司掾除戶部主
事遷檢校官檢校覈六部稽繆非健者不授拜監察御
史尋改戶部員外郎轉左司都事吏部郎中左司員外
郎陞郎中吏戶主銓總會計而括於左司悉以能稱擢
大名路總管兼府尹諸軍鄂羅管內勸農事甫三月改
河間等路都轉運鹽使課登而歸天厯初起為冀寧路

總管兵後歲大旱瘁力拯撫甘澍屢降歲以熟管州盜
連無辜辨於制使釋者三十二人移袁州未行改都漕
運使積有羨而漕無滯遂以疾辭繼有東昌總管之命
年迫休致不起官九轉至嘉議大夫遂堅閉不復出獨
日與里翁奕他無所嗜也至正五年八月四日終于正
寢壽七十有五九月五日乙酉祔于置度里禮部公之
塋先世有塋交口至禮部始葬于是配蕭氏封河間郡
夫人先卒弟簡今奉訓大夫陳州知州起家世賞公之

讓也子一人允文娶單氏女一人未行姪女一適昭文館大學士韓公子嘉興路判官軌公有堂名善樂嘗屬有壬記焉人生安於所遇無適非樂反是萬鍾千駟不樂也饑寒不能謀旦夕而吾廩有餘粟一命可以行其志而吾位至崇顯反而思之凡蒞芥於胷次者可冰釋矣公席世業以裕其生致通貴以發其蘊得於天亦豐矣就令得復過是其樂未必及是也以樂名堂顧不有見於是乎年六十舉子又畢其娶又瞑目地下之大者

也銘曰

有厚其生復駛其馳孰拂所為孰撻所施辨幕無撓典
郡惟良于飭于委靡效弗章符竹何加桑榆云迫容膝
有堂忘形有奕伊果孔碩其實惟一俯仰百歲能事斯
畢交口之塋乃曾乃祖域茲置度實始禮部宰木公植
溘焉茲祔一支百斯既安且固

故集賢直學士兼國子祭酒郭公墓誌銘

有壬索居鄉里求友惟切昔在中臺中執法同年馬伯

庸稱安陽郭公之賢不絕口蓋伯庸居光山公嘗主簿其縣予雖鄉人奔走四方乃不一識至正癸未夏公自淮西歸稻田里第惠然過予洎旰微伯庸之言益信遂內交焉予亦時至稻田蔭喬木登崇臺談讌樂甚尋赴國子祭酒未幾即引年歸徙居于城過從益數乙酉夏大病方起乘車如稻田予謂氣體未盡復忌車馬馳簡止之公自度無虞竟去病果復作幾殆既愈入城又病痢遂不起子皞奉狀請銘予其可辭吾鄉巨室不乏儒

而教授至三世者無有也大父諱文禮金鄉貢進士涇陽平章安公兄弟皆其徒也以公貴贈亞中大夫彰德路總管輕車都尉汾陽郡侯配魏氏追封汾陽郡夫人父諱維禎承家學教授鄉里後學以儒名者多出其門試儒中選復其家因得占籍太廟為禮樂戶贈嘉議大夫祕書卿上輕車都尉汾陽郡侯配宋氏汾陽郡夫人公諱思恭字子敬甫冠已為里社師聞成均作人負笈趨焉故事陪堂生輸錢乃食祭酒耶律公閔公貧苦免

其輸補伴讀及格乃教徒于京其徒有以儒至達官者
為汝寧教授六年教育有成除光山縣主簿有惠政丁
太夫人憂服除移汝陽主簿辟掾河南行省調晉寧錄
事剽繁有聲既代郡人請主晉山書院遷猗氏縣尹民
有爭田久不決者至即決之訟由是簡興學勸農有古
良吏風召為國子助教學官素號難為公凡為四十月
講課誨導諸生安焉陞博士拜監察御史出僉燕南河
南兩道廉訪司事歷雲南漢中淮西三道副使務持大

體吏畏而民安之在淮西歲餘即歸中途有集賢直學
士兼國子祭酒之召在師席三月諸生方仰以大其成
而請老疏出不可留矣既歸葺先廬治城居構亭曰斯
可以娛暮年稻里有世塋樹築充拓不自知其遽附也
壽七十有二卒以七月二十三日葬以九月二十六日
丙午配王氏累封太原郡夫人先公卒子二長曰鞏以
蔭在選籍次皞也女七五有家二未笄公歷官十四轉
積階正議大夫六在風紀得行道焉惟大司成之職彤

伯荀卿而下可考也唐以宰相兼判重可知已我朝許文正公始正一位元長之席師嚴而道尊厥後掄擢每難其人予在政府衆議嘗及公而不果乃卒為之儒而至為祭酒師席之隆無以復加而又考終鄉里在公無憾矣予識公才二年契闊居半城居方密邇遽又永別倡而執予和也言而執予聽也嗚呼惜哉銘曰

三世縫掖恒業佔畢淑人孔多善慶斯積澤流有源子孫其逢種學而稔濟道而克世有淺夫苟綰一綬棄其

素業若視芻狗仕優則學克踐斯言不刑而教朱墨自
研持憲作威惠狃于隨我不爾仇爾盍我師幼為諸生
鼓篋于子老正臯比五百其徒法容休致人貴知止鄭
穆精強留亦行矣山林市廛或往或來有倡必酬有酒
必陪田娛里嬉方幸得朋若堂之封乃遽子銘既貴而
壽獲正丘首藏石播辭偕是悠久

故中奉大夫侍御史慕公墓誌銘

至正乙酉九月十日中奉大夫侍御史衛郡慕公終于

家子濬州知州瓚馳倅奉行實請銘有壬昔與公同官
春坊承乏叅議中書省事公又左司郎中銘其宜為公
諱完字完夫世居新鄉徙于衛五世祖統宋丹州宜川
令曾祖諱億祖諱攄累贈嘉議大夫禮部尚書上輕車
都尉追封燉煌郡侯考諱津累贈集賢侍講學士中奉
大夫護軍衛郡公妣賈氏蔣氏俱衛郡夫人公年十三
而孤貧不能卒儒業習法家即有聲由府憲史掾禮部
中臺若中書右司除大都留守司都事改戶部主事以

習爰書移刑部凡三年調江西省都事未行改山東道
廉訪司經歷言衛士飼駝馬宜聚櫪以絕散居之擾鄉
民德焉故事中書掾出官從六品仁皇痛懲吏弊終考
者降二等至從七品止俄以愚哲同滯俾得展陞公始
局於例止官從仕郎至是拜監察御史即超授奉議大
夫轉左司都事僉燕南道廉訪司事盜馬牛者改用重
典錄其犯在命未下以前者仍以故典決之獲生者數
十人入為中丞御史臺都事擢淮西道廉訪副使蘄黃

因有造偽幣及奪人木者屢赦疑而不釋讞而俱釋之
合肥有殺人而縱之者執而正其罪移燕南副使在淮
西言盜馬牛法重刑部議久不決公為侍郎始用大德
輕典遷右司郎中又出為山東副使刮弊惠窮興學督
醫抑良為倡者四十七家皆發而良之歷左司郎中參
議中書省事江南行臺治書侍御史刑部尚書燕南廉
訪司有錦衣之賜有司翫習以法行之得官幣汨沒者
萬餘定土風市物不鬻擲錢擊賭盜訟以熾悉禁絕之

拜治書侍御史特命陞侍御史公自陳吏限從七展陞
三品亦已幸矣而又冒陞二品是倖門由完啓也不允
尋以父母殯淺土請歸治葬久始得請賜中統楮幣一
萬五千緡甫襄事遣使賜上尊召復職力請休致給半
俸終其身壽七十有七娶賈繼李皆衛郡夫人子四人
瑾瑜早卒璣以國子員為太祝復以廢至今官皆李出
一幼未名女三人長適留守經歷巴延次適尚恪次適
行臺御史孟撝孫一人文奴以某日祔新鄉岡上原先

瑩公早孤能自樹立以亢厥宗推封二代雖先世流澤有自亦公之恪持厥身靖共爾位有以致之也愚讀公行實見其所列限吏顛末甚備而因有感焉古之仕者上為公卿大夫下為下士為鄉師里胥未有不出於學者周官曰學古入官議事以制政乃不迷學以為政道本一致岐而二之未見其能政也秦昉用刀筆吏儒之與吏始判然為兩途劉氏襲餘習而大臣蕭曹輩率以是起家馴至建元故有刻木不對之語厥後封畛益分

而治益以陋我朝至元間大興文治雖一時名儒用無
子遺然天下之大簿書期會之繁因仍金舊悉以付吏
任之既久趨之者日益衆紛紛弊端於焉呈露仁皇抑
之也其有激之哉且儒之與吏幼而誦習也同出儒師特
所取有多寡之不同爾得山林之一木江河之杯杓已
適於小用矣既乃仇之何也愚與公游最久得其人焉
最詳不惟不仇而又有樂於吾徒焉可不銘也夫銘曰
惟古為學匪半其至已修而治業精而試猶水有源防

且無決杼而灌漑咸被其澤又如構室羣材必儲大木
小桶遇用即輸贏秦滅經炎劉因陋惠文彈治三尺是
究康莊共由封畛遽分吁嗟顓蒙孰拯溺焚我武既偃
文物蜩興彬彬諸儒適際休明繼者迹熄遂淪於習乃
於吾士瞠若仇敵亦惟吾士罔克自知不知學之宜其
腐之不惟腐之又詆而侮之然質之美者造詣亦異又
何有乎町畦若吾完夫蓋更名而儒行殊途而同歸岡
上之原永奠幽宅而有不亡者存視此貞刻

至正集卷五十九

欽定四庫全書

至正集卷六十

元 許有壬 撰

碑志

安伯寧知府墓志銘

至正六年八月十二日丁巳朝列大夫沔陽知府安公
卒於家子承衡致其兄承規之辭以狀來請曰先子辱
友公有年矣今不幸至大故志諸幽以昭示無極者舍

公其誰幸哀而賜之銘公於有壬父執也先公為會福
寮屬公實都事有壬居江夏去沔陽甚邇公之政日有
聞銘復奚讓即其狀叙之曰公諱禮字伯寧起家河南
憲史歷掾中書除徽政院檢校覆料官改彰德路經歷
入為會福院都事官文林郎擢戶部司計出為大名路
治中陞知沔陽府蒞官以能稱其在大名沔陽尤為可
稱者至順初朝廷慎擇郡邑官有聲於京者往往外補
是以有大名之役元統初詔辟守令臺憲交薦是以有

沔陽之除大名王邨在馬部曲三千人若居器餽廩芻粟或給諸官或假諸民規約有方吏不得並緣為姦王嘗欲擊毬於宣聖廟隙地公進曰此風化所原非戲所也王為止又嘗以行事得失問公公極言其失王怒公徐曰王問當以正對諛以陷王不義可乎王悟改容謝之傅尉者有罪遇原朝服出迓公叱曰汝囚伍也而與命官列乎斥去之別駕程之沒也養子脫因冒世賞再受命矣嫡孫安童既長乃誣以罪公釋之且歸其蔭他

如監輸租則費大省市織緞則直先給止導川之妨農
息牧地之構訟皆表表有聞此大名之政也沔地卑濕
民重網罟而輕蠶桑公程有司教以樹養之法且諭之
曰一時之勞官若強汝無窮之利官能汝奪乎期年有
成民今德之新廟學作祭器廣生徒置書籍得學租隱
者州若縣為石二千五百有奇河南行省檄公經理德
安屯田軍民之訟遂決朝廷遣使分道決囚公承命分
江西以平允稱此沔陽之政也二郡皆紀之石公平生

嫉惡太過故所至與物忤雖怨之者不免一一而公論
的然以公為是者林林焉晚年以霜溪自命夷猶鄉里
種花蒔果手題其軒曰歸興曰涉趣志可見已得年六
十有七葬汲縣觀頭原先塋也上世居滄州樂陵考始
占籍於衛祖考諱實徙葬焉考諱國平贈中順大夫同
僉太常禮儀院事上輕車都尉追封武威郡伯妣許氏
顧氏贈武威郡君配王氏封武威郡君子男六承規其
長也承矩早卒承權刑部令史承衡承度承量女二長適

梁桂次未行孫男三恂忱慥女二銘曰

嗚呼伯寧自古皆有死公豈獨靳其生胡晝而晦胡夜而明晦明相禪胡虧胡成世固有久生而無益又孰若速朽而有名伊公英英邁蜚厥聲閤於沔水張於元城城復於隍無損公之剛水涸於陸無隄公之肅維彼黃堂維此泮宮豐碑峩峩於以載功晚歲歸休左右圖史以畊以學貽厥孫子收英斂華韜光沈馨矢於霜溪永保堅貞淒其長往嗚呼伯寧吾不知死生之相承吾知

吾銘

黃巖知州梁君墓志碑

予居鄂聞岳巴陵尹梁公彥升有善政且知為同里人
予游湘中君為船戶提舉始識之粹然古君子也既而
請銘其大父按察公碑倥偬未遑越四年始克銘又三
年為至正丙戌公歸自黃巖一再見九月廿九日卒於
家以十月廿六日祔安陽郭村先塋姪友直孫楚來請
銘嗚呼銘其祖石猶未樹又銘其孫弗忍也然悉其世

孰其賢鄉人莫予若也安得而弗銘公諱遷相人也考諱莊妣郭氏大父諱貞終朝列大夫山南湖北道提刑按察副使妣張氏曾大父諱璧妣史氏君以祖官蔭望江縣主簿移英山改萍鄉州稅課提領陞巴陵縣尹天臨路船戶提舉黃巖州知州兼勸農事官自進義副尉四轉至奉訓大夫為令若守為政有可紀者焉其佐邑也大旱致禱而澍雨應沿部使者檄讞獄而寃致平其作邑也弭劇盜平金賦終更民弗忍其去其作郡也修

學校均鹽課足倉儲民方詠歌其惠而公浩然引年去
矣年甫六十有七配楊氏繼張氏贈恭人子男一溟先
卒女五俱適名族孫男四楚麓餘未名公有兄曰達達
有子曰友直友聞公之考既卒按察公尚無恙治命曰
遷其後我再傳則歸達之子公歸即以蔭歸友直而不
私其孫可謂善繼志矣公喜讀書寡言笑鄉里稱善人
為政綽有祖風而又有二異焉世有年逾七十而匿年
冒進者公力辭於未及之年一異焉世有不幸卒官而

道路阻修遂不得葬公引年歸躬具棺槨若預知之者
二異也不可以不書銘曰

惟按察公孫彥升治民家譜善繼承蹟著淮甸彰巴陵
黃巖惠愛尤可稱世今民帥未足憑剛者猛鷙劇虎鷹
柔復脂韋罷弗勝不綽不競政乃恒我銘爾祖惟其能
我銘彥升惟其繩繩武有要先競競侵晨餐藥夕飲水
繼世守之世以興

大元贈奉直大夫大同路應州知州飛騎尉追封

大同縣男傅公墓碣銘

公姓傅氏諱仁義世居代郡祖諱琪金兵馬大元帥父
諱德貞祐兵亂徙雲中大同縣占籍禁軍娶刁氏二子
長良臣次即公也良臣三子二孫子逸其名孫蠻子下
津間公娶張氏五子斌瑞璉瑄琦斌為河東考牧官娶
師氏二子克誠克復三女適崔李楊瑞娶張氏一女適
王璉有幹局起家奉常知印除將仕郎大盈倉副歷鄆
城縣丞武州判官南倉監支納富寧同提舉陞奉直大

夫兩淮都轉運鹽使司判官課登有金緞之賜初娶李
追封大同縣君子赫克女適今參議中書省事李述彥
古封隴西郡夫人繼潘若齊生子皆幼卒田一子克昌
瑄娶劉子克強琦娶郭子克柔曾孫男曰元曰亨曰貞
曰禮曰智曰信曰敬女四人公性稟端莊涉獵書史不
與物忤雖匱乏不妄干人惟力田以自給以子貴贈奉
直大夫大同路應州知州飛騎尉追封大同縣男張氏
累封大同縣君祔焉判官剛直而敬慎釐司貨利淵藪

少不慎若衣素縞行塗炭鮮有不湮者富寧民凋瘵積
弊非一日宿額酬入歲必取盈乃能潔其身而不湮登
其額而至盈可不謂能乎人謂應州之教有素也既休
致首拓兆域礱石儀凡可以奉其先而合於禮者舉為
之介其婿彥古請銘其墓道之石余昔過居庸并塞西
北山川風土可得而稽焉惟代自昔著稱至漢地尤居
重雲中氣習大率近似慷慨豪俠之士實生其間婚姻
葬祭之禮兼南北之宜而揚其親於不泯質諸禮而不悖

者傳氏有焉自其先兆域石刻班班可考豈獨示法奕
世而一鄉之化於一家者由是可徵矣應州力田自給
以義教其子判官敬慎自持以禮顯其親是銘之刻三
善具焉使雲中之人知立教之要以勞不以逸一也知
教子之道以義不以利二也知顯親之實以禮不以俗
三也風移俗易顧不在茲乎編修官拜特穆爾既志應
州之墓予因有考而叙其世又系之以銘曰

惟代山川據雄峻介子之裔世登俊金火一熄無留燼

吾土吾身不容殉雲中乃徂勞不償椒聊繁衍陞復振
祖風獵獵流諸胤謹正於官著忠蓋疏封及親秩有郡
戴礪樂石欲傳信俾翁世有無窮聞平生所植德惟慎
善源吾啟後其濬于嗟汨汨流無盡

故元處士徐君墓志銘

承事郎湖南道宣慰使司都元帥府都事黃常仲綱狀
其舅氏處士徐君行實請銘於予予讀之竟壯其辭自
足為銘奚復余請辭不獲則本其狀而筆之曰徐氏世

有聞人至鉉之孫祖禹刺饒愛樂平永豐里風土家焉
厥後簪紱蟬聯君諱舜臣字熙載曾大父文蔚大父體
仁皆潛德曠察父一龍博學能文尤深於易宋末舉進
士而谷陵變遷矣國初薦遺逸擢將仕郎寧國路旌德
縣尹敦迫視事未期月以視親歸累徵不就卒於家娶
王氏二子君次也髫髻如成人才復敏甚侍郎談公應
斗僉判詹公載采連騎過旌德君試君書義援筆立就
辭采可觀二公大異之年十五失父又四年失母從兄

居喪克合於禮屬時艱虞雖未卒業而應酬事物洞乎
有見渙乎無滯演析名理聽者忘倦既長益自樹立里
有為不義者必顯責之雖熟惡亦畏戢其或見絕於君
即衆不齒有過者每自恐曰徐君得無知之乎扶義墾
菑無間疏賤邑有武斷吏不敢詰它日一守至將繩之
武斷煽其黨賂行部文致其罪守素清慎君慨然偕百
餘人詣行臺言狀氣直辭激一府感動守賴以白與守
無素也守來謝君曰吾為義不為守避不與見然善善

急而惡惡亦不緩負才不少自下故所至多落落年五十屏跡不復出鑿井種竹治具娛客客去則琴書自適視軒冕漠如也一日顧諸子曰吾以明日晡逝矣有遺言可書於簡凡十餘則大要訓以孝謹俾不辱其先及期果如所言家人環泣復張目曰毋亂我言訖而絕

關

年

關月

日也享年

關葬

娶許氏故宋提幹大琮之孫

京諭志德之女長沙通守李公睦之外孫也其歸也舅姑已卒歲時有事哀誠如逮事者處士好客傾匱橐相

治不靳卒祔處士墓三子希旦希奭璉二女適方崇文
陶泰璉洎陶女他姬出孫男五澤潤清澄挺女三昔王
烈以義行稱鄉里有盜牛者至謂刑戮自甘願不使王
彦方知予嘗恐後世不復有如此人者今處士其庶幾
乎身雖不仕見之行事仕所不及與守無素能直其枉
雖古豪俠蔑如也使效一職於所當為有不為者乎世
有受人之寄於所當為而愀然不肯為視處士獨不愧
乎仲綱至順庚午進士仕而益昌於學力於為善蓋有

舅氏之風馬銘曰

惟士為士拔乎齊民或出或處歸善則均云胡鄒書處
乃橫議况盜虛名遂薄於世特立有人剖破封畛不事
詭遇不為克隱我無橫議我不盜名惟義所在我其力
行蛇蝎可殺芝蘭可植苟適其便孰忍不力謂非我職
實善之賊積德厚大振振繩繩况得陽元蔚乎才名太
史秉筆數善而書千載而下知有樂平之徐

大興國寺碑

浮屠氏之教入中國千二百餘年歷代尊信金鋼海浸
無隙可抵無堅不決我元以不殺一天下而慈悲之說
默有符契既建都邑即貶及其居日新月盛金碧煥麗
環拱宸極萬姓仰瞻如罔祇園兜率是宜其徒男僧女
尼莫不因佛慈悲廣上德意思致崇極於以祈休贊化
焉蓬萊坊大興國寺者今住持大師比丘尼監藏巴所
創也寺承制賜今額請記於予按師姓常氏真陽信都
人大父榮有巧思尤善製鞍因近侍博囉進見世祖皇

帝上嘉其精藝命直宿衛從幸上京至黑峪紅寺上謂
榮曰山林延袤若此宜多良木朕已詔有司禁樵採者
四面各十里汝可留居歲取材製鞍獻之上京勅其子
策丹濟爾噶岱代直宿衛策丹早卒濟爾噶岱拜監察
御史師策丹女也八歲召入宮上憐其幼命皇后子之
性聰慧謹恪善迎順后意日見愛信俾掌鑰司出納年十
九后上仙移事嗣后寵信尤篤年二十四奉旨適近臣
翁吉喇特匱具之費悉資內帑歷成宗武宗仁宗三朝

睿眷益隆賚貺無虛歲翁吉喇特仕至資德大夫會福
院使然師早慕真如深懼滿盈重惟聖祖聖后天涵地
育恩德罔極涓埃思報舍佛焉依英宗即位懇請上前
始聽出家詔役監藏官帝師受具落髮仍為易法號曰
監藏巴既契夙願遂盡出衣資藏畜竭力以圖營構闢
地鳩工掄材伐石爰作爰謀屢閱寒暑天厯初賜楮幣
中統二萬五千緡且勅后妃藩邸將相大臣各有所輸
得凡十五萬緡平生賚貺若匱篋諸積舉以資締構之

費其費不貲矣經始某年某月迄工某年某年中樹正
殿後列法堂重門邃深周廊迴合齋庖庫庾罔不畢備
像設有嚴鐘鼓有節師身率徒衆昕講夕誦寓華封之
祝年八十有六聽聰視明無異常時益謹戒律獨超覺
海滋殖福利六宮敬禮簡在宸心今上皇帝顧念世祖
舊人無幾而師巋然獨存是用錫之嘉名以昭殊渥嗚
呼休哉昔無染區區不忘其本君子有取焉若師者可
無述乎余故具列懿行著銘茲碑且俾嗣其傳者知寺

之所以成教之所以大銘曰

我觀世間人具佛性一念之微無量感應念有萬殊善惡何分惟忠惟孝迺善念根婉婉女師究大秘奧昔聞佛言受恩思報列聖在天澤厚仁深何以報之象教足欽捨身匪吝構宇有赫慧日監臨臣心無數朝仰白毫夕禮金容願施法雨振我皇風佛力無邊帝德廣大億載同符爾徒克賴爾徒孔多遵是法門梵唄洋洋永報國恩



至正集卷六十

欽定四庫全書

集部

至正集卷六十一至五

詳校官編修_臣錢樾

侍讀_臣孫球覆勘

總校官降調編修_臣倉聖脉

校對官中書_臣潘曾起

謄錄監生_臣左德濬

欽定四庫全書

至正集卷六十一

元 許有壬 撰

碑志

元故中順大夫同知吉州路總管府事李公神道

碑銘

公諱克忠字公謹姓李氏麓泉其自號也世居青州魯
大父諱松佩銀符山東東路樂鹽使大父諱楨知登州

父諱顯四歲孤祖妣張夫人挈以避難七歲族有為帥者攜之入覲十四能騎射從帥征淮藝日益進帥器之任以機警擢千夫長歷鄒滕尉河南等路管民權府招集撫慰薄稅均役民德之始徙滕家焉事張夫人以孝稱定鄉里義約以篤友助就養吉州過徐徐故治也父老迎而勞之有感泣者年七十八終於吉州官舍公幼穎悟自知力學業成入京年甫二十八風紀詞垣交刺騰薦遂掾吏部朝廷遣使安南責以六事署安南國達

嚕噶齊府知事偕哈爾薩哈雅等行至元乙亥四月也
時江南未平由臨洮渡河源經土蕃涉麗水過莎車至
牂牁逾南詔善鄯金齒水陸萬餘里至其國其人外雖
恭而奉行未決移書責以大義諭以禍福取所貢物歸
土蕃梗途行雲南新開道丁丑夏始達上京上親臨問
錄所經山川地里人物風土洎安南日厯國主問答上
之賜金符擢奉訓大夫工部郎中兼計議俾再往使江
南已平道廣西差近至即得其要領已卯三月達上京

尋命復往庚辰四月挈其使黎仲佗奉表納款九月至
京師而使事竣矣上嘉賞命為城守之長主者要一見
卒不往僅除奉議大夫同知岳州路總管府事撫字發
擿恩威并著命民藏冰初皆怨咨明年大疫得冰既愈
播之詠歌改泰州尹未期擢中順大夫海北廣東道提
刑按察副使二親不能往委貲於弟俾奉甘旨甫一年
聲實大振思親即歸鄒滕民羈滯嶺表者三十餘人給
以食載之歸蓋將終養焉廟堂熟公之能若夫均大名

傳驛之偏拯河間鹽法之弊決山東獄內之滯皆承攝
而著績者也改同知吉州路總管府事慨然曰廬陵詩
書人物之府舟便而吾親可偕此吾祿養時也抵郡寇
盜方熾除攘之力居多葺郡學新大成殿諸生紀之石
權府捐館哀毀踰禮奉柩歸滕廬於墓側親朋勸以母
在始歸給從弟克明終其身安南盡出橐金贖歸鄉人
之陷於彼者平生急於行義類此壽五十六卒母朱夫
人夢吞天星生公卒之夕有星隕里門夏然有聲配賈

氏封隴西郡太君男女各一人男希顏廕南昌縣主簿
附省縣治人難其任而剖決如流科稅先完民有訴兒
為豪子跽死者傷有足指痕詰之曰彼豪子著履來乎
曰然曰著履安得有足指痕此必自跽而以誣人也訊
之具服辟行省掾從捕贛賊文檄旁午處之裕如身親
行間發矢命中錄勲賞一等擢袁州路經歷部使者薦
其能遷鉛山州判官署兼捕盜建亭曰簡聽昭盜弭也
陞建寧路推官太君年邁不赴築亭種植優游仰事者

十年自號靜山太君服除除松江府判官驗力定
役吏不得舞智歲糧四十萬石痛刮宿弊致期預登省
檄封海舶漳州染癘歸陞奉訓大夫溫台海運副千戶
改太常太樂署令俄以疾卒壽六十有二配張氏女適
陳孫男三人稷登泰定丁卯進士第今監察御史穉廕
永嘉縣尉補江浙省行人穎先卒女一適孔通稷以某
年某月某日遷權府而下葬滕縣闕村之原狀其世德
請銘諸麗牲之石李氏自鹽使至御史六世矣鹽使鬱

而未啟登州啟而未廓權府廓而未鬯至公鬯矣而天
復斬年造詣止此有家之隆世固有入事業之大有志
之士不能無望於公也愚謂公之樹立非炳炳較著者
乎士生用世雖主乎學苟無氣以克之所就亦淺近爾
持被入直三省顧婢子語刺刺不能休者滔滔也公
視萬里如跬步三往返如須臾移安南書及為詩八十
韻皆激烈有氣主者要其一見將市恩邪抑求賄邪夫
以視萬里如跬步三往返如須臾之氣而肯枉已以徇

人乎故雖五品貳職亦足以行吾志苟一枉已崇秩華
貫能直人乎愚聞有功而食報未盡者在其子孫御史
仕日起食公之未食者審矣繼御史而延續者尚有望
焉銘曰

仙李擢根有大其植幾世幾年而華而實踴踴攝府邁
種惟德故老之思見於垂白使乎專對豪傑以之南交
萬里不測之夷曰三往返猶庭適達帝曰汝能其俾長
郡伊誰利惜乃竊天柄我君我知我忠我職爾何人斯

我爾私覲通守豈卑惟安所遇持節嶺海飛霜暑路岵
岵興思鄉僑偕去奉常承家惕若敬勤官不貴大貴世
有聞十年膝下萬事浮雲清廟禮樂吾可為矣條焉長
往曷云能止嶄嶄諸孫危科是掇續聞無忝繼志尤恪
勇冠義階是日升奕世流澤益肆以宏瞻茲佳城松
柏有光本支百世於乎不忘

故浙西道宣慰司都事贈嘉議大夫禮部尚書上
輕車都尉南陽郡侯鄧公神道碑銘

公諱澤字潤甫姓鄧氏其先世居渤海五世祖諱某仕金為保州刺史始為蠡吾人皇元肇造國王穆呼哩既定蠡吾公之祖諱德以才傑見知國王載與俱歸更其名赫爾根承制為管領河間深冀蠡民匠達嚕噶齊以卒父諱天瑞母康氏篤於義方之教故公幼以孝謹稱於鄉里稍長讀書喜賓客善議論出入兵間習知兵事每策勵自許慨然有用世之志至元十一年秋王師南伐立行樞密院衆推公才諳宜在帷幄遂辟為掾省文

檄調兵食綜理密勿大為主將所知而襄樊以南望風俱附矣會朝廷新置使宣慰黃州等路仍絀公為令史轉提控案牘未幾江南平授將仕郎黃州錄事酬其勞論者少之而公不以屑意也十七年秋陳桂龍父子反漳州閩中騷動廷議以公前在軍有能名擢為行中書省左右司都事佐其軍討平之比還進階承事郎改浙西道宣慰司都事浙西宗故都民俗奢靡而士習巽懦少年惡子乘時縱暴為奸利者以什伯浮言胥動上下

睽睽不相保公白上官悉取寘諸理而於扶微興壞賑
乏抑奢所以勞徠安輯之者尤汲汲焉於是齊民始有
蘇息之願矣二十二年宣慰司移治揚州公仍都事積
勞當遷方嚮大用而病於杭遂不起享年三十有九實
是歲之九月廿三日也配張氏生子巨淵早卒次配朱
氏生子巨川起家太子司經知印累遷為江浙行省都
事入為太府度支監丞宣徽資政院判官遷福建都轉
運鹽使朱夫人卒服除改江西推茶都轉運使國制三品

疏封二代公之父贈亞中大夫僉太常禮儀院事輕車都尉南陽郡侯妣康氏南陽郡夫人公嘉議大夫禮部尚書上輕車都尉南陽郡侯配張若朱封如其姑公始卒時朱夫人年二十四巨川甫三歲守節自誓朝廷嘗旌其門年八十有賜幣至八十三歲以沒巨淵子三人曰洛河間路鄭州稅使曰淇曰汾山東鹽使奏差巨川子五人洙大都留守司令史曰瀉國子生卒曰淮環衛官亦里好溫筆且齊曰泌國子生卒曰涇女二人長適

河東廉訪司知事康損次適蓀縣主簿陳崇本初公之
沒也旅殯於杭後五十有八年為至正二年七月十有
七日始克返葬蠡吾先塋之次又六年巨川始以國子
監丞李君黼之狀請為文刻其墓碑蓋巨川仕而益貧
久而後克信其志也愚交巨川久義不得辭竊惟我世
祖皇帝之定江南也網羅才俊盡屈羣策以成混一之
業小大不遺文武并用規模宏遠矣然當是時元勲碩
臣既皆功在桑常世昨茅土至於羈勒之勞尺寸之效

依乘風雲致位通顯者比肩是也惟南陽公結髮從軍
參預籌策再平寇暴綏靖南土使天假之年積累盛大
其奇謀偉績必章章然有可稱者顧位不酬能身殞名
沒可悲矣夫雖然吾聞畜德晦善其施必達巨川踐敷
中外聲名蔚然由其子之所立而後公之所以積慶自
躬者庶幾乎可睹也國家推恩泉壤侈以通侯之貴生
也弗食沒而彌章然則刻銘壯石以示久遠其誰曰不
宜為之銘曰

惟鄧侯潤父蟲吾之英學書學劍久知名我師大介欽
以興下馬草檄如流星策勛僭爵得若驚南藩寇虐削
屢平國有新舊典重輕吳兒作姦吾是懲上官操割大
軌經幕中畫諾實發硯一朝使節移廣陵署雖易地秩
乃仍人期步武將青冥拾級甫七隕厥登三十有九丁
頽齡令子克似業以宏起家斗食至專城南陽啟祚世
有承宜爾孫子方繩繩於躬不耀沒則榮惟畜不施抒
也亨終古有考在茲銘

故奉政大夫淮西江北道肅政廉訪使贈嘉議大夫禮部尚書上輕車都尉追封恒山郡公諡正肅布延公神道碑銘

淮西江北道肅政廉訪使布延公卒十一年至正龍集丁亥子中書檢校官神保列行實請易名制贈嘉議大夫禮部尚書上輕車都尉追封恒山郡公諡正肅神保拜監察御史以愚同官中臺諫銘諸阡乃序而銘之公諱布延字君卿輝和爾氏世家高昌曾大父諱薩里台初

贈集賢侍講學士中奉大夫護軍追封恒山郡公諡
孝懿大父諱布延圖呼蘭從太祖西征歿于陣贈資善
大夫中書左丞上護軍追封恒山郡公諡靖忠祖妣燕
按迷失追封恒山郡夫人父愛全受知憲宗莊聖太后
尤禮之始命徙居鎮陽蓋太后湯沐邑也贈榮祿大夫
司徒柱國追封趙國公諡文靖公幼敏達事北安王奏
請悉屬之起家贛州路石城縣達魯噶齊王封邑也時
寇蔡五九張甚發民與戍卒扼其衝復石橋為賊所撤

者大疫躬督醫藥癘氣為息新公宇社稷廟學部使者
薦五事備五年始代人不忍其去拜仁宗潛邸一見器
之補東宮筆且齊典環衛文籍既正大寶詔御史臺除
公御史繩糾無所避紐勒歡元帥伊呼森等受賕承詔
往鞫正其罪正旦糾朝儀有二品立一品班首斥使退
不從劾罷之上行幸次大口問宰臣御史七品布延散
官正八何也對曰初任當爾乃特授承事郎擢僉河北
河南道肅政廉訪司事陞辭賜魚籃觀音像靈壁囚李

殺劉繫獄獄卒嗾誣其兄指授文致之讞得其實釋其兄黜汚吏四百人舉才俊皆知名移漕西道平江民岳武斷吏不能制論以法佛者白雲宗蠹浙尤劇上其事朝廷為奪印罷之運使李英恃鹽法貪虐發其贓部使者牒公詣行臺行臺復屬公走中臺上已行幸又馳至上京事聞上深嘉賞酌酒親賜且命上方賜食勅臺臣中書擇能吏與本道雜問罪人得而淪人甦矣改燕南道黜收守之不才者英宗幸定興五臺皆以行部進見

賜賚優渥衛士不敢肆暴上有命公力奉焉陞河南道副使民熟公皆延頸以望信陽囚王蠻兒輩本農家傭嘗往來卽良甫家卽值盜主者疑蠻兒輩瘐死且二人察其狀釋之俄得真盜光州改奉元路總管蓋罷吏騰謗聽者不察因以劇郡中公期年化行以疾去移守吉安大旱民食蕨本且盡至有牽妻子水死者蓋公自作縣迄守二郡皆際大饑或勸分軍民或力請於上或鬻爵募民身所不及分官往賑急甚水火為粥以食不能

自食築屋以居無所於歸極救荒之策誠之所至禱雨
輒應奉元黍稷穗生槁節間前後全活不知其幾縣若
二郡皆紀之碑召入遷奉政大夫淮西江北道肅政廉
訪司俄致仕歸後至元丁丑八月三日卒於正寢九日
葬真定東陽村先塋兄宗統克呼呼圖魯默色仲兄昌
國州達魯噶齊碩裕實弟奎章閣大學士趙國文穆公呼
圖克都呼默色娶輝和爾氏封恒山郡夫人生子杭壘蔭
承務郎同知諸暨州事再娶吳兒生神保國子生釋褐

歷贊憲幕有聲由御史僉浙東海右道肅政廉訪司事
女二人長適江南行臺治書侍御史布尼雅實哩次適江
南行臺監察御史額森托音孫男三人女三人皆幼公
起家藩邸試縣小割游刃有餘地文穆精輝藹書位極
清華上嘗憫公職不逮弟公矢辭誠恪益結主知要職
華貫汨汨然來矣仕有崇卑然見諸事業者崇卑不與
焉持憲為賢使者作郡稱良二千石始終一致完節退
歸所就豈淺淺者哉自奉寡薄祿入賓祭之餘買田宅

以處兄弟宗戚皆可銘者也銘曰

高昌墮土育才孔殷旁行專落實肇我文天造動闢用
宏茲貴季也操觚譯潤芸閣叔也崎嶇牛刀甫割天眷
一顧順流注壑矯矯持斧我豈人仇縱其蝨賊力罔有
秋惟枉斯直惟當斯劉兩守大郡厄丁其會號饑顛連
形鵠色菜我不爾急是我爾創一道澄清浩然賦歸左
圖右書雍容燕娛子孫誥誥兄弟怡怡七十有五壽斯
謂得疏封惟崇易名有赫究其邁種猶稼而穡鎮土厚

良蛇蟪於恒繚以溱沔中為佳城我銘不泐百世是徵

至正集卷六十一